

欽定大清會典事例

卷

七百十三至
七百十五

兵部

兵籍

欽定大清會典事例卷七百十三

兵部

兵籍 八旗拔補兵缺

八旗拔補兵缺。○順治初年定。每佐領下親軍缺。由護軍馬甲間散壯丁內拔補。前鋒缺。由護軍馬甲間散壯丁內拔補。烏槍護軍缺。由護軍馬甲內拔補。護軍缺。由馬甲間散壯丁內拔補。馬甲缺。由步軍間散壯丁及開戶戶下壯丁內拔補。步軍缺。由間散壯丁及開戶戶下壯丁內拔補。每佐領下領催缺。由馬甲步軍內拔補。該

旗將拔補之數。按季報部查覈。僅有懸缺不補。冒領錢糧。或違例拔補者。查實劾奏。○康熙七年題准。

盛京甯古塔。西安。江甯。杭州等處駐防馬甲病故。有子嗣者。准其頂補。若無子嗣。該將軍副都統。將其戶下壯丁頂補馬甲。如有應承受家產之主。在京情願取回其戶下壯丁者。該都統用印文咨部。確查果實。准其撤回。即於彼處壯丁內酌補。若原係戶下充兵。令往駐防者。本身病故。應撥正身壯丁往補。○二十五年題准。西安等

省駐防馬甲病故。其已披甲之子弟內。有願扶
柩來京者。亦准來京。願在外者。仍留充兵。如有
缺額。該將軍等於滿洲蒙古舊壯丁內。選擇補
用。果無堪擇人丁。移咨到部。撥人往補。如不令
舊壯丁披甲。止以新丁充數者。該將軍及該管
官。皆照例議處。○二十六年。覆准。每佐領下。將
不應披甲之人。錯誤挑補者。該管佐領。驍騎校。
罰俸三月。參領。罰俸一月。領催。鞭五十。如係徇
情拔補者。將徇情之參領。佐領。驍騎校。降三級。
調用。領催。鞭八十。如佐領。驍騎校。領催。徇情。而

參領不知。或驍騎校領催徇情。而佐領不知。止於失察者。仍照錯誤拔補例處分。其披甲之人革退。○又議准八旗馬甲。年未衰老。尚堪效力。輒稱年老規避。令家人頂替者。鞭一百。革退。容隱之該管佐領驍騎校。皆罰俸六月。參領副參領罰俸三月。都統副都統罰俸一月。其職官子弟能入學肄業與考者。免其披甲。若有指稱讀書游蕩失業。該管官容隱不令披甲者。皆照容隱例處分。○五十二年題准。雇倩漢人壯丁。稱為滿洲。令其披甲。該佐領驍騎校。皆罰俸三月。

領催鞭五十。其馬甲所領餉銀餉米。交與該旗著落本主照數追取入官。其雇倩之人。仍令為民。○雍正元年議准。八旗選補馬甲。於滿洲壯丁內。視其能騎射者。選補。如不敷選補。於開戶滿洲戶下滿洲家下舊人內選補。其得與充補之人。務選善於國語騎射者。方准披甲。如滿洲閒散人不能國語者。給限三年學習。三年後不能習熟者。不准選取。○二年奉

旨。八旗各增設養育兵六百人。其如何選補之處。該旗定議具奏。欽此。遵

旨議定。滿洲旗佐領下人數多寡不甚相懸。所選四百
六十名。應令各旗不論佐領。在參領內選取。蒙
古漢軍旗下佐領數目多寡不同。論旗選取。恐
有不均。應不論旗分。合計八旗總數。按其佐領
多寡。均勻選取。其選取時。必擇實係貧乏及嫻
於騎射。可以學習之正身餘丁。至於參領佐領
所屬閒散滿洲多寡不一。亦務令均勻。從公選
取。如有徇情違例選取者。照例議處。至養育兵
有能勤於學習嫻於騎射者。遇護軍馬甲缺。亦
准拔補。○又八旗都統等議奏。選取馬甲。該佐

領與驍騎校等。先將正身人等。擇其應得者。告
知參領。參領等復加詳閱。擇其尤者。送都統。副
都統。驗其人材。公同選取。如本佐領下正身人
內。有應補馬甲之人。而佐領驍騎校不舉。惟將
佐領之兄弟族中家下人等。選取者。即行革退。
給予佐領內貧苦單丁。儻佐領族中果有寡婦
孤子貧苦之人。應留者。仍行留給。又選取馬甲。
令於正身人內選取。若有未便之處。仍於佐領
下開戶滿洲戶下滿洲內。擇其善騎射者。選取。
再每佐領下領催。係佐領驍騎校以下辦事之

人應將現在家下人之充領催者悉行革退。其開戶者照常留役。嗣後如有領催缺。皆於正身馬甲間散滿洲內選取。或其中無可取之人。於本佐領下護軍內調取。有違例選取者。發覺之日。將佐領驍騎校與本參領該都統等一併議處。奉

旨。據爾等所奏有正身將正身選取馬甲。如正身滿洲少時。將戶下滿洲選取等語。儻正身滿洲最多之佐領。其孤寡之人不得錢糧。何以為生。有似此者。爾等將該佐領下人悉行傳集。徧行曉諭。其如何給予孤

寡錢糧。不令匱乏之處。再行議奏。欽此。遵

旨議定。寡婦之子。年幼不可充馬甲者。止令其為養育

兵。若以額內馬甲為寡婦養贍。誠恐不肖之徒。籍養贍寡婦之名。將馬甲恣意與家下人充補。未免冒濫。漸至家下人等充馬甲者多。正身滿洲充馬甲者少。如遇委署護軍。及選取護軍之時。恐其不能接續。嗣後馬甲仍應於正身及開戶人內擇其善騎射者選補。或該旗內果有孤貧寡婦無錢糧養贍者。將其佐領下人傳集曉諭。令其家人充馬甲外。餘仍照前議行。○又議

准革退旗員內有家計艱窘情願充護軍馬甲者。驗看騎射。准其選補。○又

諭。凡年老護軍。除應升護軍校驍騎校外。其年已老邁。不在應升之例者。若竟革退。殊覺可憫。著統領會同都統等。將伊等轉補驍騎營行走。其護軍缺。即令人材少壯馬甲轉補。則護軍亦得整齊矣。○又覆准。領催缺。於該佐領下正身馬甲間散內選補。若佐領下人無可選者。會同護軍統領於本佐領下識字護軍內調補。有不遵定例選補者。該參領佐領驍騎校暨都統等。一併照例議處。○八年

題准八旗候補候選微員。選期尚遠。情願充馬
甲者。聽遇應選時。仍許按班補用。○又覆准自
發遣處寬免放回。及自行贖回人等之子。並籍
沒家產人等之子。有願充護軍馬甲者。驗看騎
射。准其選補。○十一年議准。前鋒缺。由前鋒統
領會同護軍統領。於護軍馬甲養育兵執事人
閒散壯丁內選補。其親軍內有未滿十年者。亦
准選補前鋒。護軍缺。由護軍統領會同都統等
於該佐領下馬甲養育兵步軍執事人閒散壯
丁內選補。若該佐領下無可補之人。於該參領

下通融選補。至錫伯人等有材技出衆者亦准選補護軍。○十三年議准各旗步軍及鐵匠缺於開戶人及家下人內選補。若係孤寡並無家人者准借親戚家人。無論白契印契均准選補。其鐵匠著役後不准別充差役。該管處秉公甄別分作三等。一等給餉四兩。二等給餉三兩。三等給餉二兩。不入等者給銀一兩。應領之米照銀數給發。○又覆准革退兵丁後除犯十惡及因軍機獲罪殺傷人命帶軍器脫逃外。有情願充補護軍馬甲者。驗看騎射亦准選補。如果改

過行走勤慎者。有應升之處。准其列名。○又奏
准。選補馬甲。該佐領等不將應補之人呈送都
統等驗看。私行頂替者。降三級調用。其頂替之
人革退。○乾隆元年。覆准八旗養育兵。除閒散
餘丁照常選補外。如旗下有年幼並無產業。及
無馬甲等錢糧養贍者。年過十歲。該參領佐領
據實具保。該都統等覆實。即行選補。○二年。覆
准。養育兵年至二十五歲。不能騎射者。佐領具
文聲明。鈐以圖記。送步軍統領衙門。選補步軍。
○三年。覆准八旗生齒日繁。而馬甲限有定額。

應將正身選補。不應用開戶之人。其現在開戶人內已經選補者。毋庸革退。再步軍匠役等缺。例應選取家下人。若開戶人內有情願應選者。亦准選取。○又奉

旨。陣亡開戶分戶領催馬甲之子孫。著為正身。與軍營撤回另記檔案之人。一併選取馬甲。○又議准八旗養育兵缺。於該參領所屬正身餘丁。並奉

旨。作為正身。另記檔案。及自首另記檔案人等內。年十歲以上者。選補。如有不敷。將九歲以下之餘丁。亦准選補。至鰥寡孤獨貧困無依者。不論年歲。

均准選補。其革退官兵。覈其所犯原係輕罪。及
年老無子。或自幼殘廢。未經當差者。皆准給養
育兵錢糧。以資養贍。○又議准在京馬甲缺。不
准將駐防壯丁撤回頂補。○四年議准駐防馬
甲缺。先將正身壯丁選取其正身中有年力稍
幼。而三年後可以造就者。亦准選取。如再不敷。
准其於開戶分戶人內。年力精壯。技藝可觀者。
選取充補。○六年奏准八旗所出馬甲缺。在每
月初十日以前者。於本月錢糧冊籍未過部之
前。選補將新補馬甲應得錢糧一併造入冊內。

送部。其在初十以後者。於下月初十日以前選補。如將初十日以前所出之缺。遲延不報。及呈報後。該管官不即選補。或已補不造入冊內送部者。將呈報遲延造冊遲誤。不即選補之該管官。照例議處。○又議准八旗滿洲蒙古馬甲缺出。先於正身內選補。如不得其人。再於本佐領下閒散壯丁及開戶家人內。擇其善騎射者選補。漢軍馬甲缺出。不准選取開戶家人。○二十一年議准八旗選拔護軍。及護軍調補馬甲。仍照舊例。令都統與護軍統領一同選拔。如護軍